



17 Abril 2021

Mensajen husi Embaixadór Austrália nian iha Timor-Leste, Peter Roberts



Benvindu mai ami, embaixada nia buletín dahuluk ba tinan 2021. Ho situasaun kazu COVID-19 ne'ebé aumenta no inundasaun iha semana Pásqua nia rohan, hirak ne'e hamosu dezafiu ba período ida ne'e. Ha'u louva oinsa mak Timoroan sira foti dalan hodi responde ba ida ne'e. Austrália orgullu tebes sai parseiru ho ita-boot. Ha'u fiar katak ita nia relasaun agora metin liutan kompara ho tempu antes ne'e.

Ho transmisaun COVID-19 ne'ebé mak sa'e maka'as, agora liu-fali tempu antes ne'e ita tenke kontinua práтика hahalok seguru ba COVID-19. Kada ita ida-idak iha papél ida hodi ka'er no halo hodi hamenus hada'et infesaun no proteje ita nia aan no mós ita nia komunidade. Austrália kontinua serbisu ho Timor-Leste, liuliu ho Ministériu Saúde, iha esforsu hodi responde.

Protesaun ne'ebé di'ak liu mak liuhosi vasina saun universál. Austrália haksolok tebes hodi fornesa tulun ba Timor-Leste hodi asesu vasina COVID-19 ne'ebé seguru no efetivu, liuhosi COVAX no mós liuhosi fornesimentu vasina hirak ne'ebé mak prodúz iha Austrália. Atinje kobertura tomak sei ajuda ita nia rejiaun atu rekupera, rekonstrui no sai prósperu.



Austrália nia asisténsia foun foin dadauk ne'e inklui:

- 01 Osan ho montante Dólar Amérikanu millaun 5.4 (Dólar Australianu millaun 7) hanesan tulun emerjénsia ba asisténsia umanitária depoizde inundasaun iha semana paskua nia rohan.
- 02 Instalasaun tanki bee hamutuk 33 ba fatin 25 hotu inklui ona ba iha sentru evakuasaun no komunidade sira ne'ebé mak afetadu liuhosi ami nia programa PARTISIPA hodi fornese distribuisaun bee mo'os emerjénsia no hamenus risku moras ne'ebé transmiti husi bee inundasaun nian.
- 03 Imidiatamente fornese hahán, bee mo'os, materiál ijéniku sira no toba-fatin ba ema ne'ebé vulnerável liu iha sentru evakuasaun sira liuhosi ONG sira ne'ebé mak iha Australian Humanitarian Partnership ka Austrália nia Parseria Umanitária nia le'et.
- 04 Apoia psikososiál ba sira ne'ebé iha sentru evakuasaun, inklui ba labarik, liuhosi ami nia programa Nabilan no parseiru sira.
- 05 Apoia imidiata depoizde inundasaun hodi restaura serbisu esensiál sira hanesan eletrisidade no bee nian iha fatin kritíku sira inklui ba Sentru Integradu Jestaun Krize, Laboratóriu Nasionál no sentru izolamentu COVID-19.
- 06 Aviaun Royal Australian Air Force nian husi Austrália nia Força Aérea entrega materiál asisténsia emerjénsia ho totál tonelada 27 resin, inklui Ekipamento Protesaun Individual, materiál ijéniku, sasan dapur nian no sasán tenda / hela fatin nian.
- 07 Dezlokasaun primeiru ho membru na'in rua husi Austrália nia Ekipa Asisténsia Médiku ka sigla Inglés: AUSMAT – espesialista saúde sira atu serbisu ho Ministériu Saúde nia ekipa vijilânsia hodi jere nesesidade saúde públiku husi COVID-19 no inundasaun.
- 08 Programa Kooperasaun Defeza fornese apoia finanseiru no mós rekursu umanu hodi apoia F-FDTL iha fornelementu eletrisidade emerjénsia, planeamentu, hahán, bee mo'os, no atividade limpeza nian.



09

Apoia konektividade liuhosi Programa Voo Aviasaun Pasífiku hodi asegura sasan umanitária esensiál sira, materiál médiku no pesoál saúde sira bele halo viajen hodi tulun ba esforsu responde nian.

10

Austrália nia Polísia Federal apoia PNTL hodi mantein sira nia operasaun depoizde inundasaun no kontinua hodi tau atensaun ba seguransa fronteira nian ho dalan konstrusaun ba postu fronteira remotas foun líma no fornece formaçsaun liutan kona-ba oinsá kombate violénsia bazeia ba jéneru.

11

Osan ho montante hamutuk Dólar Amérikanu millaun 18.8 (Dólar Australianu millaun 24.3) hodi apoia Timor-Leste nia asesu ba vasina, inklui apoia tékniku no prátilkal nian ba COVAX nia kampaña (inklui jestaun distribuisaun vasina, lojístiku no edukasaun saúde públíku), no oferta ida hodi fornece vasina AstraZeneca ne'ebé prodúz iha Austrália hodi bele distribui lalaís liu iha momentu ne'ebé iha dezafiu ba distribuisaun vasina iha nível internasional.

Austrália nia apoia ba vasina sira, ba COVID-19 no ba apoia emerjénsia ba Timor-Leste aumenta tan ba osan ho montante Dólar Amérikanu millaun 77.5 (Dólar Australianu millaun 100) ba parseria dezenvolvimentu anuál ne'ebé babain fornece .



Aleinde iniciativu governu Australia nian hirak ne'e, haksolok tebes móis hodi haree solidaridade ne'ebé mak povu Austrálianu- ida ne'e nu'udar testamuña ba relasaun ne'ebé mak metin tebtebes entre ita nia-ema iha rai rua ne'e nian.

Buat hirak ne'e sei la posivel bainhira karik laiha esforsu serbisu ne'ebé lahatene kole husi Governu Timor-Leste no ninia pesoál liña-frente sira. Ami nia orasaun hamutuk ho sira ne'ebé mak afetadu.

Atu atualiza nafatin ho informasaun foun no dezenvolvimentu sira, favór tuir ami nia pájina Facebook 'Australia in Timor-Leste'. Ita bele hetan ami nia buletín edisaun antigua sira iha ami nia sítiu website.